


# *NU LWITIKO, MOSE*

 Ndaga ugwe, Nkundwe Neville. Ulubunju ulununu, mwebakundwe. Ikyene kinunu ukuya apa umwisyugu mu nyumba. Kangi une ninogonaga pamo linga une namwegaga Nkundwe Neville ukulumbiliila ulubunju ulu, une angali ngelile namayolo aga. Kangi polelo une naketaga kunyuma uko ku kamanyilo ka sukulu ya Pandungu ukuya ka lubunju ulu. Kangi fyofindunki . . . Linga Untwa ikwitikisya, uswe tukugelaga uku—ukuya nako akamayilo ka Pandungu aka.

<sup>2</sup> Lilino, igyene gikundilemo imilungu mibili lilino, ukufwana, ukufuma papo une nisege. Kangi une ndinalo ulutende fiyo muno umwe mukumanyila, mpaka, pambombo pala, une ndinkuya naloliloli, naloliloli nkatale kangi une ndinkutoligwa nukukindilila. Kangi une ndikufimbilisigwa ukwisa kuno ku lutusyo ulunini itolo. Kangi une negilepo amasiku matatu ukubuka kula ku Wolf Creek Dam, ukwingilila mu Kentucky, kuko une naapapiligwe. Une ndinkwinogona, “Oko, une ngwipilika kanunukanunu itolo lilino. Une ndikanunu.”

<sup>3</sup> Kangi une ndinkugomokela ku kaya, kangi akandu akanini aka kaganaga na nine nkisyo kali ko luko lumo ulwa mbombo sya boma ukufwana nu kukoma unsongo. Une ndinkubuka injila yosa pasi kangi. Polelo une ndinkusyagania ukwene kukwegaga ukukinda undungu gumogwene itolo pamo mibili ukuti ndusye une kangi.

<sup>4</sup> Kangi ubutumigwa bwangu bukwitendendekesya ukwisanusya lilino. Kangi une sikayapo nasimo ingomano sitendekigwe. Kangi iyo yo nongwa une n’duko lumo mbagwikeko itolo, kangi ninogwine, kangi lilino ukwisa imilungu mitatu, une ngwegaga itolo ulutusyo, lutusyo ulupelelesye, nu kugulila pa Ntwa.

<sup>5</sup> Kangi mwebingi ba umwe bandu muno, mwe bakulu-baiyolo, mwe muli nanuswe kabalilo katali fiyo, mukukumbukila isi sisyo Untwa ayobile kumyitu, Umwene akabalilokosa abombile ikyo kikyoy Umwene aayobile Umwene ikubombaga.

<sup>6</sup> Kumbukilaga, akabalilo kako kubwandilo fiyo, nkipanga muno, ulubunju ulu uswe twaalege ibwe lya nyumba, mumo fikuti Umwene. . . Ikyene kisimbigwe, kangi kili mwiibwe, pa lyani-lyakwanda lya Ibangeli lyangu. Ulubunju lula, imboniboni ingulumba yila, yayobile, “Iyi yika nyumba yako umma.”

<sup>7</sup> Une ndinkuyoba, “Yilikugu iyene, gwe Ntwa?” Umwene alinkunyikasya une pasi pa mabingu. Kangi Ilisyu lilinkwisa. Kangi une ndinkuketa kangi ndinkufibona ifikohekano fitatu, ukufwana, mipiki ni fipaso fya ifyene, na fyosa. Umwe mumenye

ukuti imboniboni yo fiki. Ikyene kisimbigwe, ukukindilila ifyinja fingi.

<sup>8</sup> Ukufyusya mmwanya, ilisiku limo, u buku ugwaiyolo kumwanya kula, bo ngubala simo mwa findu ifi Untwa aayobile, ukuyobelanganila; sitalile siboniike. Ukufwana ni findu fyabwanike ifi, kangi ukufwana muno ubwite bukwandilaga, kangi fyosa filafila fitikile.

<sup>9</sup> Fisyete itolo fibili fikabombigwa, mu fimo fya sololi ingulumba sila. Ikyo kyo, ukuti amagali gayege pa nsebwe aga gikwenda gene, gikuboneka bo lifumbi, kwene kukuti ugwe utikulyendesya ilyene. Ilyene likwiyendesya lyene. Kangi apene pisakuyapo unkikulu unkulumba ikufyukila mmwanya, kabuno America kyo kikolo kya nkikulu. Kangi ikylene kisa . . . Unkikulu unkulumba isa kufyukila mmwanya, kangi nukuya Puluzidenti pamo ikindukimo bo ikyo, nkisu. Kangi polelo kwisakwisaga umpuuto gwa fyosa. Ikisu kyosa kisa kupyugutigwaga.

<sup>10</sup> Kangi, ikyo, une ngusakikisya . . . Lilino ifi akaya yo Ntwa ikuyoba umma. (Ikingi kila, ukufwana nu nkikulu, ikylene kyo, kyo yu Ntwa.) Loli une naasakikisye, mu 1933, ukuti ikisu kikwaganaga mu mpyuto bo yikafika '77.

<sup>11</sup> Polelo, une ngaamenye akabalilo kalakala ukuti abene baali ni kindukimo, ukuti kibagile ukupyuta ikylene muno abene balinakyo lilino, loli une nakibwene ikisu mbupyuto gwa fyosa, gyene gimikolo gwa mipiki ni findu bo ifyo, gisyete.

<sup>12</sup> Polelo, ikylene kikwisa pa nsebwe gwake. Kangi linga fyosa ifindu ifingi ifi fisile ukuboneka itolo muno Umwene aayobile, ukuti fikuyaga luulo fyoep, fili itolo muno aayobile nd'Simbo apa, ifi Umwene ikuyoba, linga Khristi aalisile akabalilo kakwanda, Umwene ikwisaga akabalilo kakibili. Kangi ifindu fyosa ifi Umwene aayobile fisa kubonekaga. Kangi nkabalilo kake tukuketa iki, kangi pakuti tumenye ukuti uswe tuli . . . imbalilo yitu yili kifuki ukukoleligwa, ukuya kiisu, tumenye ukuti Ikipanga kili kifuki ukwega Ulunyakiligwe Lwake. Ikyene kikukung'usya indumbula ya ndumbilili, pamo aligwesa ugwankipanga, ukumanya ukuti uswe tuli mu lisiku ili na kabalilo aka uswe tulimo. Akene ko kabalilo kakulumba ukukinda aka umundu aligwesa aalimo nu bumi pakisu, ko lilino lululu ulu; ikyo kyo, kya ku Kipanga. Polelo, une naloliloli ngunyonywa inyiputo syinu.

<sup>13</sup> Kangi polelo une ngetile mu nyumba iyi, kangi ngetile ukuti abene bayaga . . . bayaga ukuya nu lusalo-lwakibili na fyosa, mu kipanga, ukusala aba mu mbukambaala na fyosa.

<sup>14</sup> Kangi—kangi ikipanga kyalondigwaga ulukomano lunini, ukusasania kunini. Kangi umwe bwila muli baakisa fiyo kuli une, kangi mukunsaya une. Kangi une pakuti ndi'apa, ngufwana ndi'lusayo kwa umwe. Kangi une nsisimikisye, ukuya na umwe, luyile lusayo kwa une. Kangi umwe akabalilo kosa mwtikisye

iki une njobile ukuya Kyabwanaloli, muno une ngetiile ukwisila mwa Kyala. Kangi une—une ngupalisya ikyo.

<sup>15</sup> Polelo lelo, une nalyandile nkati, kangi lelo une nasyaganiaga, nukupela ikipanga kyoutu kigolosigwege, mu mabukambala gake, kangi panongwa ya lusalo na fyosa. Kangi polelo—polelo, une ndinkwinogona, ukufuma pali isyo, une ndinkusoka panja nukwegako ulutusyo lunini bo ngali ngagomokelamo pambombo kangi.

<sup>16</sup> Bikaga ikylene pakati pamwibene. Lilino, ikylene kikaya kyabapanja umma. Ikyene kya kipanga iki. Uswe tukulonda ulukomano ni kipanga iki, ukuti filifyosa, kangi ubusobi bulibosa, ifindufyosa ifi fyabombigwaga, kangi lumo ukwipilika ukunini ukufuma kwa yumo kunnine; ifyo, une nguyapakwega kalikosa ka utwene nukutwala itolo pamaso-na-pamaso. Polelo linga ugwe utikulonda ukwagana nakyo ikylene, ugwe kinunupo usokemo nkisu; kabuno ugwe kwaganaga maso-na-maso nakyo akayabo kalikosa ka ikylene, muno uswe twaabombelaga apa pa kipanga. Kangi fyosa ukutenenesigwa posa, panongwa yakuti uswe tuli bakundwe na bakalumbu twe tuyabenie umugonesyo, Umbili gwa Kristi, pa kigemo kya isayo. Kangi akayanayumo loli yu Mohesi yo abagile ukutendeka kilikyosa iki kibagile ukuya kibibi, kangi ukutendeka ukwipilikapilika, pamo ukulaasulania, pamo akandukamo bo ako. Kangi une ngumwega Unkundwe gwitu Neville, kangi uswe tukubuka ukufuma apa ukuya apo, kangi ukutwala abandu ku bandu, palikimo, mpaka ikipanga kyaiyolo kigomokelemo, ukubatigigwa kangi, pa malundi gake, ukubuka mulamula ni Kitangalala kya Kyala. Lilino, iyi yo, nongwa une njobile iki, yo nongwa yakuti ikylene kili na kabugutila kitu akanini apa ulubunju ulu.

<sup>17</sup> Kangi lilino une nguyaga pa lutusyo lumo ulunini, nukugomokela itolo nakalinga muno une mbagilile. Polelo une ngulondigwa ukuya mukwendendeka pa mbombo kangi. Kangi akabalilo aka, linga Untwa ikwitikisya, une ngulonda ukwega utunini utu uswe tubungenie muhela, na fyosa, utwa nimwene, panja mu'bu...ulubatiko lwa butumigwa bwa fisu-fyapanja ubu. Kangi nukwiyegela nimwene ikihema ikipya, nifyombo ifipya, nukwandako ukwendendeka. Komma ukufuma kukipanga ukubuka kukipanga umma, loli ukubuka mungomano syitu twibene.

<sup>18</sup> Lilino, kisita ukubaswaya abakundwe aba bangoolile une umma, ifyo fyo finunu. Loli ukufwana fyosa fya ikylene, ugwe kwaga ingomano isi, abene bikuyobaga ukuti ugwe kuyaga pala, kangi bosa abinako bope bikwisa, kangi pikuya uluko losa ulunywamu ulwa kukubil'ing'oma ihela. Ifyene fikubakatasya itolo abandu bala. Une nandile ukusyagania isyo isyene, umwe muketile. Polelo isyo syo—isyo sikaya nnunu umma. Uswe tukulonda ukuya nu buyo kuko uswe tubagile ukubatwala abene. Ugwe utikufimbilisigwa ukutwala ihela syako. Isaga itolo

kuko gwimwene, kangi—kangi m’bombelaga Untwa. Muketile? Kangi polelo lilino. . .

<sup>19</sup> Kangi ubutumigwa bwangu bwegile ukusanusigwa lilino. Umwe mukukumbukila akabalilo kako une negege ikiboko kya mundu, kangi nukwima itolo pala, kangi Untwa ambulaga une fyo fiki fyali ndamyoyabo. Aayobile, “Polelo ikylene kisakubonekaga, ugwe kwisakumanyaga isyakusofu sya ndumbula sya bandu.” Aligwesa gwa umwe amenye ukuti isi sibonike itolo katikati muno Ikyene kyaayobile. Lilino ili lyo likato ili likukonga, ili lisololigwe nukuyobeligwa ngaanila, iki kikuyaga kyakukinda fyosa fya Ikyene, umwe muketile. Kangi akene lo lululu lilino mukusanusigwa.

<sup>20</sup> Kangi yo nongwa iyi Setano ikulwana na nine nu nsongo gwaaboma, ukugela ukumbula une, aba boma, ukuti une ndi ni ngongole ya nsongo gwa pakycinja pa mbwagaya yiliyosa une negile, ukuya ndumbilili, ukufuma pala ukufwana ifyinja malongo mabili na fihano-na-fibili ifi fikindilepo, ngwingila mbutumigwa. Isyene sikaya momumo umma, panongwa yakuti isyene syendiile pakipanga apa.

<sup>21</sup> Une ne ndindililahela gwa kipanga iki. Isyo syo bwanaloli. Isyene sisimbigwe apa. Polelo, lelo, linga une yo une ndindililahela-m’bikafyuma gwa kipanga iki, polelo kakayapo nakamo nkisukyapasi umma . . . Isikali yikaya nakandu nakamo akakubompa pa kyene. Abene batikulonga ikipanga umma. Abene bakundonga une ukuya mpayafyuma gwa kipanga. Kangi abalindililahela basimbile u kalatasi uyu ali ku banki kula, ukuti ihela syangu syosa . . . Mbuyo bwakuya n’jege nu lwalo lwangu nimwene, une nsikindisye isyene ukwisila pa kipanga apa, panongwa yakuti ikylene kyo itolo yo lwalo, mulimoso.

<sup>22</sup> Kangi ukubomba ikyo, kikundula une ukuti ndingabopaga ukufuma pa kipanga nukukileka ikylene, nukubuka apo panja nukuya kisitakandu apa. Ukufuma papo une nfingeye ku bandu ukuti ngugomokelaga ku kipanga, kabalilo na kabalilo, nukubatula abene. Iyo yo nongwa une nasilekile isyene bo lululu, panongwa yakuti nafingile kuli umwe mwe bandu. Iyo yo nongwa une nikele ni kyene mu njila iyo, mbuyo bwakuya ni kyanimwene. Lelo, linga ugwe kubomba isyo, ikylene kikusopela ikylene kukibugutila. Kangi une ngulwana fiyo ni kibugutila. Lelo une—une ngukilekaga ikylene mu njila iyo muno ikylene kiyilile, mu maboko ga Kyala, ukuti uswe tubagile ukukindilila panongwa ya Kitangalala kya Kyala.

<sup>23</sup> Lilino, ulubunju ulu, uswe tukulonda ukumanyila Ilisyu ilikulu ilisayigwe ili, kangi nukuliitika.

<sup>24</sup> Lilino, une ngulonda ukuyoba, nnine . . . Une numbwene Nkundwe Egan na bingi, bamo mwa balindililahela bitugesye apa, ukufuma papo tuyeye nulukomano lwa balindililahela, ikilo kimo; ikylene kyo bwanaloli, une pabwelu pamaso pa

kipanga, ukuti aligwesa gwa umwe mwesa mutikukindililaga umma ukuya—ukuya babikigwa balindililahela. Umwe muli balindililahela basaligwa, kangi ingamu syinu sili muba buku. Umma ndaga.

<sup>25</sup> Kangi lilino abene bikuyaga nu lusalo ulwakongelelapo ulwa—ulwa baketesyakipanga, na bangi. Kangi Nkundwe Neville yo, isakubakolelaga abo linga twamalisya ubulumbilili ubu, syosa silikanunu, ukongelelapo u mpayafyuma na fyosa, muno uswe tukubatika ikipanga. Mupilikisye isyene, fyosa ifyakunyuma, fitendekesigwe, polelo uswe tubagile ukuya nululasanio mumo lukwisila.

<sup>26</sup> Lilino, bo tukali ukusanukila ku mani apa, ku kimanyisyo kyitu ikya sukulu ya Ndungu, ku Lisyu ilikulumba ilyabumi ilya Kyala, uswe tulinamilaga imitu gyitu, akabalilo kanini, bo uswe tukuyoba nu Nsimbi ugwa Kitabu iki. Kangi lilino bikaga palubafu inyinogono silisyosa, filifyosa ifi fikulwana, ukukupinga ugwe ukuti uyege nu lusayo.

Unko uswe twipute.

<sup>27</sup> Gwe mwelu ukukinda kangi Kyala mwikemo, mu Kuyapo ukusayigwa ukuyindikigwa Kwako, uswe tukwisa lilino, ukutwala kwa Ugwe ubumi bwitu, kangi imyoyo gyitu—gyitu, kangi imibili gyitu, ni mbombelo syitu, nu lweke lwitu. Na fyosa ifi uswe tulinafyo, uswe tukutwala ifyene kuli Ugwe. Kangi mumo Ugwe kuketela pa uswe, Gwentwa, linga bulipo ubonangi buli bwasi kangi bukalaatigwa, tukusumaga Ugwe, O Gwentwa Kyala, ukuti Ugwe ubagile ukupaka Ililopa Iya Mwanundumyana Gwako, Yesu, pa buyo bula. Kabuno, ukusyagania ukuti uswe patwibene tukafwana, kangi palipo apa fikabagila ukubombigwa ukuti uswe tubagilemo siku ukuya bakwifwanikisya—twibene. Loli uswe tukusubila losa pi Lopa ilipala Ilyake, ni lipyana Lyake ukupaka pa nongwa yitu, ukuti uswe twe bonangi basitakubagila tubagile ukwisa kisitakutila mu Kuyapo Kwako ilisiku limo, ukutwala pa nkyeni pitu Ililopa ili ilya Ntwa Yesu. Ili, Ugwe, nkabalilo kaiyolo, ulitikisye ukuya Ilopa Iya Mwanundumyana Gwako yumoywene ntiga, kangi ubombile ulufingo, ukuti, “Ukwisila mwa Umwene, linga uswe tukulata imbibi syitu, uswe twisa kwitikisigwaga mwipyana Lyake.”

<sup>28</sup> Kangi lilino uswe tukusuma, Gwentwa, ukuti Ugwe utuhobokelege uswe ukufwana nu bonangi bulibosa, ububibi bulibosa ubwa kukilania pamo ukoomola, ubusobi, ukuti linga inyinogono imbibi silasile umoyo gwitu, ukwisila mu ngwebo syamoto sya mohesi, ukuti ubagile ukumbopesya undugu Gwako uyu, nu gwa bandu Bako.

<sup>29</sup> Kangi uswe tukusumaga ukuti Ugwe kutumaga Umbepo Mwikemo ukuti akole Ilisyu akabalilo aka, bo uswe tukwiyipa bo fi fyombo, ukuti Ugwe ubagile ukuyobelamo mwa uswe,

nu kupilika ukwisila mwa uswe, Ilisyu Lyako. Kangi uswe tuli ambililaga Ilyene lifwanega lifumile kwa Ugwe, nukusokapo pa buyo ubu, umwisyugu, tukwipilika ukuti uswe tutendekesigwekangi ku mbombo ya Kristi; ukuti uswe tuyege bakwibagila banunupo ku bubombelambombo bwa kilo iki na kilabo, panongwa ya kuyatila kwa Mbepo Mwikemo.

<sup>30</sup> Basayaga abakundwe kulikosa, ifipanga nkisu kya pasi, aba balikolile Ilisyu Iya Bumi mulisiku ilibibi ili. Uswe tukwipilika ukuti kakayapo akabalilo kanywamu aka kasyele ukubomba imbombo, kabuno ikilo kikwisa nakalinga fiyo. Amabingu ga bwite gikwelela kangi. Ububibi buli kifuki, kangi uswe tukusuma ukuti Ugwe kutwikitisyaga ukuti uswe tubombege muno tukabombelamo siku. Tuusyaga imibili gyitu imikatale, gwe Ntwa, kangi tutumaga uswe tugomokelege ku bwite kangi. Kabuno uswe tukusumila ikyene mu Ngamu ya Ntwa Yesu, kangi panongwa Yake uswe tukusuma. Ameni.

<sup>31</sup> Bo uswe tukwigula, ulubunju ulu, ili Bangeli, ku—ku ntu gwa 11 ugwa Buku gwa Abahiburi.

<sup>32</sup> Ikilo kya pa Kitatu uswe twayobaga pantu gwa 7 ugwa Buku gwa Abahiburi, isya “Melkisedeki, ukuya kisita baba, kangi kisita yuba, kisita bwandilo bwa masiku, pamo ubumalikisyo bwa bumi.”

<sup>33</sup> Kangi une naalinogwine, lumo, ulubunju ulu, kikuyaga kytikisigwe ukwigula kangi mwa Buku unswigisye uyu, panongwa yakuti uswe tuli nalo ulwaalo ku isi uswe tukulonda ukuyoba, mu kubala kwa pabutasi. Kangi ukukilania pantu gwa 10, kangi untu gwa 9, isi syo ndagilo syafikemo, uswe tukwisaga pa buyo bwa “Iwitiko.” Kangi apa mwa Buku gwa Bahiburi, pantu gwa 11, kangi ukwandila pa manandi 23, tukubala Ilyene bo ulu:

*Nu Iwitiko Mose, akabalilo kako apaapigwege, afisiigwe imyesi mitatu na bapapi bake, kabuno abene baalimbwene umwene ali mwana unnunu; kangi abene bakaali nulutende panongwa ya ngomelesyo ya mwalafyale.*

*Nu Iwitiko Mose, bo umwene isile ku bukusi, alinkufuya ukukooeligwa mwanundumyana gwa mwanundindwana gwa Farao;*

*Ukusala kununupo ukutamigwa i ndamyo palikimo na bandu ba Kyala, ukukinda ukwikyela mufyakwisangalusya ifya bonangi pa kabalilo;*

*Ukufyusya ukwifuyula kwa Kristi ukuya bukabi bwakukinda ifyuma fya Aigupto:... kangi aali nu bugomokesyo ukuya ku mfwalo.*

*Nu Iwitiko umwene alinkutaga Aigupto, kisita kutila ubugasi bwa mwalafyale: kabuno umwene*

*alinkuumulisya, bo ikumbona umwene uyu akabonekaga.*

<sup>34</sup> Une ngulonda ukwega ikumanyisyo, ulubunju ulu, “ukusala nu lwitiko.” Kangi ngulonda ukwega, pa masimbo, amasyu gakubwandilo matatu a gantu gwa 23, *Nu Lwitiko, Mose*. Kangi, “ukusala nu lwitiko,” kifuki filifyosa ifi tukubomba, uswe tukufimbilisigwa ukusala nu lwitiko. Kangi syosa uswe tukusyaga ukuti Mose aabombile, ikyo kibagilile ukwandisigwa, kyali nu lwitiko; komma nu kuketa, loli nu lwitiko.

<sup>35</sup> Kangi inongwa iyi une nsalile iki ulubunju ulu, panongwa ya kipanga nkayilo aka, syayaga isyo mfyitu. . . mope mmasukulu gitu, kangi mosa, uswe tulinafyo fingi ifimanyisyo fyasayansi. Panongwa ya ifi, uswe tubakwabile abandu ukusokako ku lwitiko. Lilino, ulwitiko lutikulinganisigwa nu sayansi. Ulwitiko lo ulu sayansi yitikuketa. Kangi uswe. . . Linga uswe tukutagaga ngamo siku ulwitiko ulukulumba ulu, kokuti uswe tuli mu ngisi losa, ikyene. . . sikayanimbombo ukuti uswe tumanyile kanunu bulebule, muno uswe tubagile ukulingania Ilisyu Iya Kyala, ukufwanikisya ni njila yitu twibene iyakwitikila.

<sup>36</sup> Yikayapo injila iyakunsangalusya Kyala siku, kwene ukwisila ndwitiko. Ilisimbo likuyoba pabwelu ikyene mu njila yila, kangi ikyene kyo nu lwitiko. “Kangi kisita lwitiko,” likuyoba Ilisimbo, “ukwene kukabagila ukunsangalusya Kyala.”

<sup>37</sup> Polelo, linga ulwitiko lukulwana na sayansi, kangi sayansi yikulwana nu lwitiko, ikyo kikufibika ifyene pa—pa lubafu lwa kimo ku kinine, polelo uswe tukufimbilisigwa ukwega unsalo muno Mose aabombile. Nu lwitiko uswe tukwitika!

<sup>38</sup> Lilino, linga uswe tukutaga ulwitiko, polelo uswe tutikwisa siku ukuya nu lwiputo lwamuliigwe na Kyala. “Panongwa yakuti umwene uyu ikwisa kwa Kyala abagisenie ikwitika tasi ukuti Umwene yo uyu, kangi mpi gwa bosa aba nulumulisyo bikundondesya Umwene.” Polelo, linga uswe tukutaga ulwitiko, inyiputo syitu sikusosigwapo; uswe tutikubuka nakumo.

<sup>39</sup> Polelo kyo kyene iki uswe tubagile ukwinogonelapo, ulubunju ulu, ko kuumilisya ku lwitiko. Lelo, linga uswe tukutaga ulwitiko, ulusubilo lwitu losa lukindile. Kangi linga tukutaga ulwitiko, ulwiyaaganio lwitu losa ulwamwambepo lukindile. Buno ugwe ukabagila ukuya nu lwitiko mu findu ifi ugwe kuketa, buno ifindu ifi kufibona fikumalika.

<sup>40</sup> Linga uswe tuketa kwa mundu yumo unnywamu, undumbilili unnywamu, pamo ikilundilo ikinywamu, ifyene fisakupyutigwaga, ilisiku limo. Kangi linga uswe tukuketa pa kikolo ikinywamu, pamo ikilwilo ikinywamu, ifyene fisakupyutigwaga, ilisiku limo. Po lelo uswe tukufimbilisigwa ukuya nu bumi ndwitiko, ifya findu fifyo sayansi yikuyobela pabwelu. Ikyene kyo kwisila ndwitiko ukuti uswe tukwitika.

41 Lilino, uswe tukutaga ulwimiko lwitu linga tukutaga ulwitiko. Lilino, linga uswe tukusokako ku lwitiko, polelo tukukyegeka ikipanga mbusyungutiligwe bwa mahalalaha.

42 Kangi utubalilo twingi, ikylene kyinogonigwe, mkati mbandu, ukuti panongwa yakuti ikilundilo kyaali kinywamu, kangi abene baali nifipanga ifinywamu, imbaanda indali, kangi inywamu, bingi ba abandu abafwale-kanunu na bamogi, kangi ihela inyingi, ukuti abene babagiile ukugula ifindu bo ifi, uswe, utubalilo twingi, twinogonaga ikyo kyabukasyo, ukuti ikipanga iki kyali kyambepo. Pamo, uswe tuyobilepo isya balumbilili bakukindanakindana aba bikusoka panja nukuya ni ngomano ingulumba isya filundilo, kangi uswe tukwinogona, utubalilo tumo, ukuti ifyene fyo fimanyilo fya bunyakyala. Loli ubo bo bukaya bosa bwanaloli. Ikyo kyo kupakigwa kwabundu.

43 Loli ukupakigwa ukwanaloliloli kukwisa mukubomba ubwigane bwa Kyala. Muketile? Kali ali yumoywene, pamo banandi itolo. Kali ikylene kipanga kinywamu, pamo kipanga kinini, ikylene kikayanimbombo umma. Kali umwene yo njobi nkulumba, gwanjobelo, pamo nnyambala itolo uyu ikwikakila ukumanya aba ABC bake, ikylene kikayanimbombo umma. Ikyene kikugwila pa ndumi iyi umwene ikutwala, kali iyene yipakigwe ni Lisyu lya Kyala, pamo, ngimba iyene yipakigwe nu lwato lwa mahalalahala ulwa kupakigwa kwabundu?

44 Abandu bamo babagile ukupakigwa panongwa ya unjobi ugwanjobelo. Ikyo kitikupela ikylene ukuya bwanaloli. Utubalilitumo abene bikupakigwa panongwa yakuti unnyambala amanyisigwe fiyo mpaka umwene abagile ukutalusya ifundo syosa. Ikyo kitikusanusya ukuti ikylene kyo kya Kyala umma. Muketile?

45 Ikyene kyo kwisila Ndisyu ilisayigwe, ilisitakumalika Ilyabwilanabwila ilya Kyala, tubagile uswe ukwambilila ukupakigwa, kangi ikyo kikupepigwa na Mbepo Mwikemo. Nu lwitiko uswe tukwambilila ikylene.

46 Lilino uswe tukwinogonaga isya Mose, na kabalilo aka akakulumba aka bumi bwake. Kangi uswe tubalile kunyuma, isya kupapigwa kwake, muno Kyala alimpakikisye umwene, loli kalinkwisa akabalilo mbumi bwa Mose apa palinkufimbilisigwa ukuyapo akabalilo kakusala. Linga uswe tukubala mbwanaloli, uswe tukusyagania ukuti umwene aali mwanundumyana gwa mwanundindwana gwa Farao, kangi umwene aali gwakilingo ku kikota, kangi umwene aayaga yo farao ugwakwingilapo mu Aigupto. Polelo umwene aketesyaga bo umwene ukukelengania, bo umwene afilikilepo mbukusi nukuya gwaminogono, kangi bayaga ngapo abatumwa bala bikubomba imbombo mufibwina fya ndipa. Kangi Mose, bo umwene ikuketesya mmadirisha ga nyumbabayabunyafyale, pa batumwa balabala



aba Farao aaketaga, loli kwali ko kukindana kuki uko kwalipo mukuketesya.

<sup>47</sup> Une ngulonda naale ilinogono ilyo, ulubunju ulu, pa maminiti manandi, kang'i Kyala gwa Kumwanya ali twala ilyene ku kaya ku ndumbula yiliyosa apa. Akene ko muno kuketesyela pa kilikyosa, iki kikupela ukukindana.

<sup>48</sup> Undumbilili unkulumba yula, John Sprawl, uyu ali nsanuki gwa butumigwa bwa Nkundwe Bosworth, uyu mwebingi ba umwe mukukumbuka ifyinja ifikindepo, ugwa Old Glory Barn. Umwene aatile, ilisiku limo umwene endaga injila, bo unganigwa unnine kang'i unkasi aakali akafwa. Abene baali mu La Salle Lorraine, France. Kang'i une naali nu lusako ukuyaatako ku buyo bububu. Kang'i undongosi abalongosyaga abene ukukinda mmigunda, nukubabonesya abene ifindu ifikindanekindane. Polelo abene balinkufika pa kifwani kimo ikya Ntwa Yesu, iki kikohekano. Kang'i Tat. Sprawl aalimile pabutalipo, ikukiketa ikyene, umwene nu nkasi, kang'i, mu ndumbula syabo, baalwanaga na isi ugwalweke aabagile ukuya nasyo mminogono, pamo umpalafifwani, ndigi, akabalilo kako umwene apalege ukufuma ku libwe, ikindu ikinyali-pakukiketa iki ukuti kiyege ukukwimilila ukutamigwa nu lugano nu kupelakisa kwa Ntwa Yesu, kang'i muno ikyene kyabonekaga kisitakumalisya kang'i kikekigwakekigwa. Polelo undongosi alinkwisa kwa Tat. Sprawl, kang'i umwene alinkuyoba, "Nkulumba, une ngwinogona ukuti ugwe kukyobela ikifwani kya Ntwa Yesu."

Kang'i Umwene alinkuti, "Une ena."

<sup>49</sup> Kang'i umwene alinkuti, "Une ndikuswiga napanandi posa umma, panongwa yakuti abandu bingi aba bikukiketa ikyene, akakwanda, abene bikukyobela ikyene."

<sup>50</sup> Kang'i Tat. Sprawl alinkuti, "Nongwanki, une ndikububona ubupelakisa pamo ukupakigwa linga kuketesya ikindu bo iki, polelo une nguswiga nongwanki umpalafifwani atendekagamo siku ikindu bo iki."

<sup>51</sup> "Kang'i umpalafifwani..." Alinkuti, "Tat. Sprawl, ikifwani iki kili kanunu, kang'i umpalafifwani ali ni kindu ikitalusye mminogono gake. Loli apa ulutamyo lulipo, luli na ugwe. Iyene yo njila iyi ugwe kuketela ikyene." Kang'i umwene alinkummwega umwene nu nkasi gwake pa kiboko, nukubalongolela pasi pa kigemo pa kilundi kya kikohekano kikiki. Kang'i umwene alinkuti, "Lilino Tata. Sproul, keta mmwanya lilino." Kang'i umwene bo aketile mmwanya, umwene alinkuti ndumbula yake yaafwene yiimege ukutuya. Kwali ko kukindana kuki ukwene, ukwimilila pabutali pala nukukikeeta ikyene injila *yila*, nu kwisa pasi nukukikeeta ikyene mu njila iyi ikwene kyapeleligwe ukuketigwa.

<sup>52</sup> Kangi iyi yo njila iyi Kyala ayilile. Iyo yo njila iyi ulwitiko luyilile. Iyene yo njila iyi ugwe kuketela pa kyene. Linga ugwe uliketile ilyene ukuya luko lumo ulwa Libangeli lya syambukulu, ilya findufimo ifi fyaali mmasiku aga gakindile, ugwe utikwagamo siku untengo gwabwanaloli gwa i Libangeli. Ugwe ubagile ukwisa pa fifundo fyako, nu kupilikila ingomelesyo isya Libangeli, kangi keta Ilyene ukwisila mmaso ga Mbepo Mwikemo.

<sup>53</sup> Une ngulonda ukulalusya ikilundilo iki, ulubunju ulu. Ngimba kyo kinununki iki Kyala gwasyambukulu ikubombaga kwa uswe linga Umwene akaya yo Kyala yulayula? Kyo kinununki iki Kyala ikubomba, iki kikwegaga u Mose nukubomba ifika na yumwene ifi umwene aabombile, kyo kinununki kikubombaga kwa uswe ukubala isya Kyala bo uyu linga Umwene akaya yoyuyo Yumo umwisyugu? Bo bununu buki ubwa Kyala uyu aabagile ukupoka ukufuma ku mbako ya moto, abana ba kiHiburi, linga Umwene akaya yo Kyala yulayula umwisyugu? Bo bunununki ayege Kyala uyu ikutumula pakati pa butalusye nu busobi, mu lisiku ili likindile, nukufunda ubusobi nukusaya ubutalusyi, linga Umwene akaya yo Kyala yulayula umwisyugu? Uswe ngimba tukubuukila fiki ku kipanga? Ngimba uswe tukupagukila fiki ku findu ifyankisu, linga Umwene akaya yo Kyala yulayula ugwa lutumulo, kangi ugwa bwigane bulabula ubu Umwene aali? Ngimba kyo kinununki iki kikuyaga ukuti Kyala uyu aabagile ukupalamasyaga ikiboko kya nkikulu uyu aali ububine bwakupyu'mbili ukubibi, kangi ukupyumbili kulinkubota, linga Umwene akaya yo Kyala yulayula umwisyugu? Kyo kinununki kikuyaga ukumbombela Kyala uyu aabagile ukunkokela unnine Gwake ukufuma mwipumba, bo afwile a masiku mana, linga Umwene akaya yo Kyala yulayula umwisyugu?

<sup>54</sup> Nu lwitiko uswe tukwitika, ukuti, ilisiku limo ilisisya Umwene isakutukoolela ukufuma nkisu kyapasi, palema nalinga uswe tuyege liito ilyakwisula isupuni. Ngimba uswe tukukisisimikisya ikylene bulebule? Uswe tutukusisimikisya ikylene umma. Uswe tukwitika ikylene. Uswe tutikulaalusigwa ukusisimikisya kalikosa umma. Uswe tukulaalusigwa ukwitika ikylene.

<sup>55</sup> Nu lwitiko Mose abombile *isyakuti-ni-syakuti*. Kangi muno Mose, bo nnyambala unnini, aketelege mmadirisha ga nyumbayabunyafyale, ku batumwa, umwene akikeetaga ikubugutila kilakila ikya batumwa abasulumanie, abafitano, abapakigwe-nindipa aba Farao abaketaga.

<sup>56</sup> Kangi bo Farao abaketile abene, kangi na Baigupto, abene bakali nakimo loli kibugutila kya batumwa. Abene yo mbombo iyi baali banunu; itolo ukuya bandu bakanya ndipa, ukutendeka ingelwa sya mfu ukuya kingilo kya twaya utu Farao ayengaga. Iyo yo njila Abaiguputo na Farao babaketelaga abatumwa.

<sup>57</sup> Loli Mose, akabalilo kako umwene abakeetega abene, ukwene kwali kuketa ukukindane u Mose aali nako. Bo umwene aketile, ukukinda pa ilibwindo, inginya inywamu pa kisyo kyabo, amasosi aga gendelelaga mmasaya gabo, kangi imibili gyabo iminiongafu, umwene alinkubaketa abene ukuya bandu ba Kyala. Umwene akaabaketiile abene ukuya batumwa. Aabaketiile abene ukuya bandu basaliwa ba Kyala.

<sup>58</sup> Kangi, oko, akabalilo kako une ngwendendeka, ukufuma ku kisu ukubuka kukisu, kangi ukufuma kukikolo ukubuka kukikolo, ukulumbilila! Ukufuma papo une mfilekege ififigo fya kapanga akanini aka, ikyo kyo kibugutila kyafipangafyosa, kisita ngomelesyo loli lu lugano, kisita buku loli li Libangeli, kangi kisita kimanyisyo loli Kristi, une ngelile ukuketesya pa bana ba Kyala, kangi pa batagigwe, ukuya bandu basaliwa na basaliwanganila ba Kyala. Une ndikubalalusya abene linga abene bali kimo na Branham Tabernacle. Une ndikubalalusya abene linga abene bo ba Methodist, pamo linga abene bo ba Presbyteria, pamo linga abene bo ba Pentekosti, pamo Nazarene, pamo Pilgrim Holiness. Une ngulonda itolo ukuketa pa bene ukuya bo bana ba Kyala. Kangi ukuketa ububombelo bwabo ni mbombo syabo, ukuti abene bo babombambombo ba Ntwa Kyala. Kangi undumbula yangu yikunyonywa ubwinake na bene, kikaya ni mbomo abene yongamunki bali nayo. Une itolo ngunyonywa ubwinake bwabo. Une mbaganile abene panongwa yakuti une mmenye abene bandu ba Kyala.

<sup>59</sup> Akabalilo kako nguketa unkikulu ikwisa ukusulukila ndukindi, nikifunga ikitali, ni nywili syake sibombigwe mbumogi kunyuma, kangikangi afwele ilidiresi ilibonekelinunu; kangi une ngumbona uyungi unkikulu unnini, lumo bafwene ubukusi, afwele akabundu akanini; umwene abagile ukuya, mbubonekelo, nnunupo kabili kosa mbumogi ukukinda unkikulu gwa nywili indali yula, ukufwana nukuketa kya kisu kyapasi, loli une ngwegaga ulubafu nu nkukulu uyu afwele ukufwana Nkristi. Palema abene bikunsekaga umwene, kangi nukunkolela umwene ukuya mumilisi, loli, une ngwegaga ulubafu lwangu. Umwene abagile ukuya mmogi bo undindwana uyungi yula, mutumbakasya, loli umwene ikuketa ikindikimo. Nu lwitiko umwene ikuketa Umwene Yuyo atikuboneka, Yuyo ikundongosya mbumi bwake.

<sup>60</sup> Akabalilo kako une nguketa unnyambala pa mbombo, ikukoleligwa “ndindilakipanga,” pamo “ndumbilili,” pamo “mumilisi,” panongwa yakuti umwene ikukana ukukwesa, kangi nukunwa ubwalwa, kangi nukubuka kukumoga, ukufwana na bosa ba abene, kangi umwene ikukoleligwa “mumilisi,” indumbula yangu yikubuka kulakula ku mwene. Umwene yo nkundwe gwangu, kula ku mfu gwa Igupto, ikyo kikapela indumbula syitu sisyukile ukummubatila umwene nukuyoba,

“Nkundwe, uswe tuli bamunjila kangu bahesya, aba kisu iki, kangu une nisyukile ukwangala nanugwe.”

Mose afimbilisigwaga ukutendeka ulusalo, ukusala nu lwitiko.

<sup>61</sup> Ngimba balumyana balinga ngali banyeliile ukubuka ku lusako ulwakuya mwanundumyana gwa mwanundindwana gwa Farao! Ngimba balumyana balinga angali banyeliile ku lusako ulu Mose ali nalo, ukwikyela fyosa ifisangalusyo nu mulimuli gwa kisu, ukuya mwalafyale gwa Igupto, ukukibika ikisu kyosa ikypasi pa malundi gake! “Ngimba kyo kindu kya butoyofunki,” iki abalumyana ba mwisyugu babagile ukwinogona, “akabalilo kako Mose alinkusala ukwega ubuyo bwake na bandu ba Kyala abakubilwe na batamigwe.”

<sup>62</sup> Fiki abombaga iki umwene? Nu lwitiko, akabalilo kako umwene afyusyeye amaso gake, umwene alinkuketa ukukinda pa mulimuli gwa kisu iki. Umwene alinkuketa ukukilania ifyakusangulusya ifya bonangi. Kangu ili Bangeli liyobile ukuti umwene alyumililise aliti ikumbona Umwene Uyu ali nsitakuboneka, nu lwitiko, kangu umwene alinkusala ukumbombela Kyala yula kisita kupasya isi syaboniike.

<sup>63</sup> Isyene sikasanukamo umma. Twe bingi ba uswe tubagile ukubuka kuno uswe tubagile ukukolela inyumba innunupo. Uswe tubagile ukwikyela, lumo, ubwinake ni fyakusangulusya ifya kwitugasya mfikota ifinunupo. Uswe tubagile ukuya bafumuke, ukunwa nu kukwesa, kangu nukufwala kangu nukubomba bo kisu. Loli nongwa ya fiki? Umwe mufyusisye amaso ginu, kangu nu lwitiko umwe mukuketa Umwene Uyu atikuboneka, kangu umwe mwegiile ukwimililo bwinu na bataagigwa na ba bikukoleligwa-lulo abikemo-babunguluka ba mwisyugu. Kabuno nu lwitiko uswe tukumbona Umwene Uyu atikuboneka, ukusala ukukubilwa mukufwimigwa nukukubilwa.

<sup>64</sup> Une ndikuyoba ku bandu ukuti abene bikufimbilisigwa ukusala ukukubilwa. Une ndikuyoba umma ukuti umwe mubagile ukusala ukukubilwa. Ikyene kikaya kindu kyabundu ikyakubomba. Loli linga ingubilwo yikele mu njila ya mbombo, polelo tuli egaga uswe iyene bo yikwisa. Une ndikulonda ugwe umma ukumbombela ikindikimo yumo ukuti bakusekege ugwe. Une ndikulonda umma ugwe ukuyoba ifindu ifikindanekindane, ukuti, “Une ndi...Une ningile ikipanga iki kitikwikisya *ifyakuti-ni-fikyakuti*, nkya kisu,” kangu ni findu bo ifyo, itolo ukuti abandu bakusekege ugwe. Ugwe kutwala isyo pa gwimwene. Une ngabagila ukuyoba ukuti ugwe ubukege panja pala nu kwifuyula nu kubomba ikindikimo iki kihesya. Une ngabila ukulonda ugwe ukubomba ikyo, ukuti yumo abagile ukuyoba ukuti ugwe gwe mumilisi. Ugwe kutwala ikyo pa gwimwene. Loli linga ikyene kilambalele mu njila ya mbombo

kwa Kyala, baleke abakisu bayobege isi abene bikulonda ukuyoba. Ugwe kindililaga nubumi.

Ugwe tendekaga ulusalu. Unnyambala nu nkikulu aligwesa ikufimbilisigwa ukutendeka iki.

<sup>65</sup> Bule linga Farao abagile ukuketa ifi Mose abagile ukuketa? Umwene aketaga ukukubilwa kwa bandu. Umwene amenye gwali ntengonki ugwa kupa. Loli nu lwitiko umwene alinkusala ikylene, ukukinda ukuya ni fyakusangalusya ifya butulwanongwa.

<sup>66</sup> Balipo lumo aba kikukulu abanini, abatuwa bitugesye apa, ukuya bakikulu banike abamulimuli. Ikisu kikulonda ukuyoba kwa umwe, “Bomba *isi-na-isi*. Ugwe uli mmogi. Umbili gwako gwimikigwe mbumogi. Ugwe ubagisenie ukubonesya ugwene.”

<sup>67</sup> Loli, kalumbu gwangu, fyusya amaso gako nu kuketa ukukinda ikyo, ku Mwene uyu aayobile, “Ikyene yo mwiko unkikulu ukufwala umwenda ugu guliti bo gwa nnyambala.”

<sup>68</sup> Linga abanyambala ba bandu mbupalamani bwako, linga abakikulu aba kwangala nabo, baayobile, “Tumula inywili syako indali isyo. Ukwene kukuyaga kununupo. Ukwene kukuyaga *isi, isyo*, pamo *ikinine*.” Pamo, “Ikyene kikuyaga ugwe kanunupo.” Komma ukupilikila ku ikyo!

<sup>69</sup> Ugwe fyusya amaso gako, kangi nu lwitiko gwalimbwene Umwene uyu ayobile, “Inywili sya nkikulu lo lwimiko lwake, kangi umwene atisakutumulamo isyene umma.”

<sup>70</sup> Linga abene bikuyoba, “Ikyene kikuyaga kifumuke. Ugwe kwimaga pa bununupo ku mbombo yako, pamo na bwana gwako, linga ugwe kunwapo ikyakunwa kya pabwinake. Linga ugwe kukwesa indundu bo bosa abakikulu, ugwe kwimaga ukuya gwabwinake ukukindapo m’bupalamani bwako.”

<sup>71</sup> Nu lwitiko fyusya amaso nu kuketa ku Mwene Uyu aayobile, “Bwapusya umbili ugu, kangi une nsakugubongotola Une ugwene.” Nu lwitiko uswe tukwitika ifindu ifyo. Ikyene kikaya nakimo iki ugwe gukibwene. Ikyene kyo kimo ugwe kwitika. Nu lwitiko, Mose aabombile.

<sup>72</sup> Kangi ukwenda kwalwitiko uku, kakwisa akabalilo aka kubagisenie ukuyapo ukusala.

<sup>73</sup> Loti alinkubomba ubusobi ubupelakisa bula ubu uswe tukubomba. Utubalilo twingi tukusala kubununu bwitu twibene. Uswe tukusala ifindu ifi fikuyaga finunupo.

<sup>74</sup> Utubalilo tumo linga ukuumana kunini kukwisa nkipanga, kangi yumo abagile ukuyoba, “Ena, undindilakipanga pamo untimi ali kulubafu ulu.” Komma ukuketa pa ikyo. Keta pa iki kiikemo. Kisosya ikyo panja nukubatwala abene palikimo. Ubo bo bunyakyala.

<sup>75</sup> Kulipo ukusala. Kangi uswe tukwisalila twibene. Uswe tusalile ikindikimo iki kyabununu bwitu twibene.

<sup>76</sup> Loli Mose aasalile ukukubilwa ni fyasoni, ukuti umwene aabagile ukwenda na bandu ba Kyala. Inogona isya iki lilino. Pilikisya ku kyene. “Alinkusala ukukubilwa kwa bandu ba Kyala, nu kukyaga ikyene ukuya kyuma ikikulumbapo, kabuno umwene aalyumilisye, ukunketa Umwene Uyu ali nsitakuboneka.”

Lilino, Loti, akabalilo kamo, afimbilisigwaga ukubomba ulusalu.

<sup>77</sup> Kangi sibagilile isyene, ulubunju ulu, ukuti balipo abanyambala na bakikulu bitugesye apa, aba mwisakubomba ulusalu lwinu lwabumalikisyo. Ugwe uli umusyugu iki uli, panongwa yakuti ifyinja fimo ifi fikindilepo ugwe gwaasalile ukuya iki uli lilino. Kangi ifi kusala lilino fisakulinganiaga ifi ugwe kuyaga ifyinja fihano ukufuma umwisyugu. Ifyinja fihano ukufuma umwisyugu ugwe ubagile ukuya ntumigwa. Ifyinja fihano ukufuma umwisyugu ugwe ubagiile ukuya Nkristi mfumuke.

<sup>78</sup> Pamo, ifyinja fihano ukufuma umwisyugu ugwe ubagiile ukuya mu gehena, panongwa yakuti ugwe utendike aminogono amasobi. Ifyinja fihano ukufuma umwisyugu ugwe ubagile ukupyagilaga amatesi mu nkilabu. Ifyinja fihano ukufuma umwisyugu ugwe ubagile ukuya gwabulogwe ndukindi.

<sup>79</sup> Pamo, ugwe ubagile ukuya nnyambala pamo nkikulu uyu—uyu yo mfwalo ku bupamalani bulibosa, panongwa ya kusala kwa Kristi. Ifyinja fihano ukufuma umwisyugu ugwe ubagiile ukuya Ndwimiko, ubukile mu Kunyakiligwa, panongwa yakuti ugwe gwaatendike ukusala umwisyugu.

<sup>80</sup> Loli ugwe kufimbilisigwa ukusala. Kangi ungetaga iki ugwe kuketa. Salaga iki kuketa nu lwitiko. Ikyo kyene kikubaligwaga, kyo iki ugwe kusala nu lwitiko.

<sup>81</sup> Loti, panongwa yakuti umwene afimbilisigwaga ukutendeka ulusalu. Abrahamu ampele Loti ulusalu lwake.

<sup>82</sup> Kangi Kyala ikukupa ugwe ulusalu lwako. “Salaga ilisiku ili uyu ugwe kubombelaga imbombo.” Mu ngunda gwa Edeni gwalipo umpiki ugwa—ugwa kumanya, kangi u Mpiki gwa Bumi. Umundu apegigwe ulusako ulwa kusala gumo pamibili ugu umwene anyonywaga. Kangi mo siyilile umwisyugu. Ugwe gupegigwe ulusako, bo yu gwandumbula nyabuke, ukusala kilikyosa iki ugwe kulonda ukusala.

<sup>83</sup> Ukusoka kwangu kwa ugwe, kokwakuti, komma ukuketa ku findu ifyamasiku aga ifi fikusyungutiile ugwe, kangi nubufumuke kangi nu mulimuli ifi ugwe gwaabagile ukuya. Loli salaga, kununupo, nu lwitiko, Umwene uyu apele ulufingo ukuti ilisiku limo Umwene ikwisaga kangi isakugolosya ubuniongafu

bosa, kangi isakukupa ugwe Ubumi bwa Bwilanabwila, kangi isakukufyusya ugwe. Kikaya ni mbombo linga ugwe kwegga injila inheluligwe na baNtwa banandi, tendekaga ulusalo lula. Linga silipo indamyo nkiboko, linga silipo indamyo nkisu, linga silipo indamyo nkipanga, linga silipo indamyo nnyumba, kikaya ni mbombo isyene sili kugu, tendeka ulusalo lwako, “Nu lwitiko, une ngumbombelaga Kyala. Une ngwiyuufyaga indumbula yangu mu Kuyapo Kwake. Une ngwegaga injila na bana ba Kyala. Une ngubaketa abene baheluligwe nu kukaniigwa, nu kukagigwa panja kangi nu kusekigwa, loli une pope ngwimililaga pa mbanda ya mbombo yangu. Une ngwisa kwimililaga itolo palapala. Kangi abene linga bikukuta, une ngukutaga na bene. Kangi linga bulipo ubusulumanie, une ngusulumaniaga na bene. Injila iyo abene bikwitugasya, une ngwitugasyaga.”

<sup>84</sup> Bo yu Naomi aayobile. . . Pamo, Ruti aayobile kwa Naomi, “Injila syako siyege njila syangu. Injila syangu siyege njila syako. Kuko ugwe kwitugasyaga, une ngutugasyaga. Kuko ugwe kubukaga, une ngubukaga. U Kyala uyu ugwe kumbombela imbombo isakuyaga Kyala gwangu.” Egaga ulusalo ulo, palema nalinga lukukuyubula ikipapa kilakila ukufuma ku mabyebye gako, aga bwinogono ukuti ugwe uli munduyumo. Ukwikuyubula gwimwene mosa kangi nukwegga injila yako na nabandu ba Ntwa abaheluligwe abanandi, kangi nukumilisa ukuya nsubililigwa mu ngunda gwa bubombelambombo kangi pa mbanda ya mbombo.

<sup>85</sup> Loti alinkukelengania posa. Umwene alinkuyoba, “Une ndinalo ulusalo.” Kangi umwene alinkuketa ukwingilila ku Sodomu. Umwene alinkuketa imigunda iminunu igyalisu gyali minunupo ukukinda igi Abrahamu aaketile, kangi kuko Abrahamu aaliko. Umwene alinkuketako ku lusako lwa kulisya ing’ombe syake, ukuya ni ng’ombe indupe kangi inunupo.

<sup>86</sup> Une ngusubila ndikufulasya ubwipilike bwa yumo. Loli uko kuli bwimililo bwa balumbilili bingi, ukupepusya panandi Inongwainunu, bikwinogona ukuti bikusyagaga ihala nyingi ukufuma ku yene. [Nkundwe Branham ikukuba amaboko katatu—Nsimbi.] Itikiti ya bulilo! Une po kikinupo njegenubumi nkisu kisitakooloka, ukulya, ukunwa ukufuma mmbandayampiki, kangi ukulya ifisyesyeye fya soda, ukukinda ukupepusya pa bwitikisye ubwa lwitiko lwangu mu Lisyu lya Kyala gwabumi. Une gwegaga injila yangu.

<sup>87</sup> Bamo mwa bene balinkuti, “Billy, fyo fiki fitamisye nulukomano lwako, kabuno balipo Abapentekositi bingi fiyo ku lwene.” Undumbilili unkulumba ugwakipanga aayobile ikyo.

Une ndinkuti, “Ngimba ikipanga kyako kisakutuulaga ulukomano lwangu?”

<sup>88</sup> Kukaya kutali fiyo umma, mu kalatasi gwa *Look*, une ngusubila, kaalipo akapango. Kangi unsimbi aatile mula, aayobile sya bandu baPentekositi. Umwene aatile, “Ikipanga kya Pentekositi kyo kipanga iki kikukula mwanakalinganakalinga ukukinda fyosa nkisu kya pasi umwisyugu.” Fiki? Yonongwa yakuti abanyambala na bakikulu bafyusisye amaso gabo nukuketa pa butalipo.

<sup>89</sup> Kangi unsimbi yope alinkongelelapo ukubatufya abandu baPentekositi. O, ena, umwene aatile, “Balipo bamo ba abene aba bendile nukuya bafubanisigwe, na fyosa lululo. Loli, aba Methodisti bikwiputa ikimanyisyo. Abene bikwiputa Kyala ukwisila nkimanyisyo. Aba Baptisti bikubomba kilakila, kangi naba Presbeteri. Loli um’Pentekosti ikwiputa ukwisila mu Libangeli lyake.”

<sup>90</sup> Nu lwitiko uswe tukulubona ulufingo. Une ngwegaga ikiyabo kyangu na bene, sikayanimbombo kali abene bikuheluligwa bulebule, une angaali ndi yumo gwa bene. Palema abene bikusekigwa, kangi abene bali nu kufyuka nu kwika kwabo, mumo Israeli aabombiile, une siku ndisakwimamo nu nsololi gwabutungulu pa lubafu lwakyamba, Balaamu yumo, nukugela ukuguna iki Kyala asayile. Kabuno, nkati nkisasa kila muli Ibwe ilikomigwe, kangi i Kyabupi kyalilopa, ni Mbanda ya Moto. Sikaya nimbombo abene baali mu fiki, ikyene kikubalongolela abene ku buponjoli, kangi abene bikufimbilisigwa ukwisa ku bwene, panongwa yakuti abene bo bandu abafingigwe aba bikwenda nu lwitiko. Palema nalinga abene bakaya kipangakipaguke, abene baali bendendeke ukusyungutila, kangi momuno bayiliile abandu ba Kyala. Loli une ngulonda ukwega injila yangu na bene, ukwingila mu bene mu nyiho syabo; komma nkipangakipaguke kyabo, loli mbwinake bwabo ukusyungutila ifyombo fya Mbepo Gwabwilanabwila gwa Kyala, uyu, nu lwitiko une nambilile ulosyo lwa Mbepo Mwikemo. Kyala ndula une ukuya lwiho lulalula bwila.

<sup>91</sup> Ketesya. Bo abene bikukindilila, uswe tukwaga ukuti Loti aaketile ulusako lwa i–i ng’ombe indupe. Bingi bikuketa ulusako lwa nyambiyahela indupe. Bingi bikuketa ulusako lwa bwimikigwe ubununupo mbandu. Umwene aaketile ulusako lwa ma dola agakongelelapo amanani. Umwene alinkuketa ulusako lwa kuya ndindililakaya gwa kaya kala. Ukuya nhesya, kangi umundu gwa mahala kanunupo, muno umwene ayiliile, “Lumo une nguyaga mwalafyale gwa kaya aka.” Umwene aaketile isako panongwa yakuti isyene syabikigwe pankyeni pake. Loli umwene akaaketile u moto ugu gwisaga ukubongotola ikisu kila. Umwene akaliyinogonile mwene umma, ukuti ikisu kila kyaliswile nu bonangi, kangi Kyala aafumbilisigwe ukubongotola ikyene.



<sup>92</sup> Kangi, umwisyugu, abandu bikwikasya bene nu kuyoba, “Ugwe ngimba uli. . .?”

Une nguyobaga, “Ugwe ngimba gwe Nkrisiti?”

<sup>93</sup> Abene bikuti, “Une ndi gwaAmerika.” Ikyo kikayo nako nakamo akakufwana ni kyene ukukinda ukugela ukuyoba kwa kihobe umwene ali kyula. Ikyene kikaya nako nakamo ukufwana ni kyene. [Nkundwe Branham ikukuba ifiboko fyake kamokene—Nsimbi.]

<sup>94</sup> Umwene ikuya pakubongotoligwa, panongwa yakuti Kyala n’golofu. Kangi linga Amerika ikukindilila paitolo ni mbibi syake, un’golofu nu gwapamwene, umwikemo Kyala ikufimbilisigwaga pa mbombo uku—uku syusya Sodomu na Gomora kangi nukwilamba ku bene panongwa yakubokya abene, panongwa ya mbibi syabo; linga Umwene ikutuleka uswe tuponege ku kyene.

<sup>95</sup> Linga Umwene ikukwitikisya ugwe ukubuka ku Mwanya nimbombo syako inniongafu, Umwene ikufimbilisigwaga ukufyusya Ananiya na Safira, nukubapa abene ulusako ulungi. Umwene nalolilo abagile. Loli Umwene n’golofu. Ananiya aaketile ihela syake. Peteri aaketile Khristi.

<sup>96</sup> O, mwe! Loti akakubwene ukubongotoligwa ukwa bana bake mbuyo bula.

<sup>97</sup> Mwe bingi ba umwe, umwisyugu, mukoleliile ku fimanyisyo ifikuulu ifyumano ifi ni findu, umwe mutikuketa ubwanike bwa banabakusi nu kubongotoka kwa bana binu. Ugwe utikumbona umwanundindwana gwako ali mu nyumba ya bulogwe. Ugwe utikumbona umwanundumyana ugwako kinwelwa, pamo ikukoma injuga pa kigemo kulikumo.

<sup>98</sup> “Panongwa yakuti umwene oneleligwe kanunu-namisi.” Kangi imbimbi sitikupalamasigwa. Umwene akaalimbwene unkasi gwake, ukuya ntu gwa fibugutila fyosa, ukusanusigwa ukuya mbanda ya munyu, akabalilo kako umwene ikuketa. Umwene akaaketile umma umwene ikubopa itolo pa kapata kamino gake, ku kaya kanini kubuyobumo, ukuti ayege mumi. Umwene akaaketile ikyo umma, panongwa yakuti umwene aaketile fyene ifi umwene aafibwene nkyeni mmyake.

<sup>99</sup> Loli, Abrahamu, umwene akaketesise ikisu ikyoneleleligwa namisi-kanunu, kabuno umwene afyusise amaso gake nu kuketa kilabu, kabuno ayaga pakwingilapo pa findu fyosa. Unkristi ugwabwanaloli umwisyugu ikufyusya amaso gake mmwanya nu kuketa ulufingo lwa Kristi: “Basayigwa aboloolo kabuno abene bisakwingilapo pa findu fyosa. Abene bisakwingilapo pa kisu.” Unkristi ugwabwanaloli, nu lwitiko, ikuketa mmwanya kangi ikuketa ikyo. Nkoolelaga umwene ifi ugwe kulonda. Umwene afyusise mmwanya amaso gake. Kangi umwene bo abombile ikyo, Kyala alinkuti, “Abrahamu, endaga

ukukinda nkisu, umwene isakuyaga gwako gvesa.” Nu lwitiko, Abrahamu abombile iki; ulwitiko lulalula ulu Mose alinalo.

<sup>100</sup> Isyene syasimbigwe nu ndingani yumo, uyu aayobile isi. Une ndinkwinogona agene gali masyu amamogi ukukinda gosa. Ukuti Abra- . . . “Mose aalyegile ikinunu ukukinda nkisu nu kukibika ikyene mu sikelo yimo; kangi ikibibi ukukinda ikyabunyakyala, nu kukibika mu sikelo iyingi; kangi ikibibi ukukinda ikya bunyakyala kyali kisito-fiyo ukukinda ikinunu fiyo kya nkisu.”

<sup>101</sup> Mo muno siyilile umwisyugu, ukuti linga uswe tukukooleligwa kilikyosa uswe tukulonda tukoleligwege, “bumilisi,” pamo “babumbulusi ba Mwambepo,” pamo, “babunguluka-bikemo,” pamo ko kiliku iki abene bikulonda ukukolela. Ikibibi ikyakukinda iki uswe tuli kisakuyaga kisito-fiyo ukukinda ikinunu iki ikisu kibagile ukugula. Mutikulonda ukukoleligwa “bakuulu-baiyolo, lufufunienie ulwaiyolo, abumilisi.” Ikyene kisakuyaga kisito-fiyo ukukinda ikununu iki u Mohesi abagiile ukukupu ugwe. Ikyene naloliloli kikuyaga.

<sup>102</sup> Mose aafyusisye ukuheluligwa kwa Kristi. Umwene aaketiile-nganila Kristi. Pankyeni umwene aayobile amasyu agamaka agalukasyo ukufwana na Umwene. “Keta, Untwa Kyala gwinu isakufyusyaga mmwanya unsololi bo yune.” Umwene aamenye. Umwene aaketile nganila Umwene, kangi umwene afyusisye ukuheluligwa kwa Umwene ukuya bukabi bukulumba ukukinda mulimuli gvesa gwa nkisu.

<sup>103</sup> Nkristi mwinangu, umwisyugu, ngimba ugwe ukabagila ukubomba ikyo? Kangi gvesa mulimuli nu bufumuke bwa nkisu, nu lwitiko, uswe tukunketa Umwene uyu aafingile. Kangi ikinyali ukukinda ikyakipanga umwisyugu, mbwitugasye bwake bosa, pope Ikyene kisakuyaga kisito-fiyo ukukinda kilikyosa iki u mohesi abagile ukukupako ugwe. Linga uswe tulasuligwe, linga uswe tubongotoligwe ukuya tunyafulenyafulu, linga uswe tufuluganike nu kubalanila, mfipanganio na m’bumilisi, ikyene kisakuyaga kisito-fiyo ukukinda kilikyosa u mohesi abagile ukutwala. Naloliloli.

<sup>104</sup> Umwene aafyusisye mmwanya ulufuyulo lwa Kristi ukuya bukabi ubukulumba ukukinda ifyuma fyosa ifya Igupto. Polelo umwene aafimbilisigwaga ukubomba ikindukimo. Umwene alinkutaga Igupto. O, une ndiganile ilisyu lila. Umwene alinkutaga Igupto. Muketile, umwene aketelaga ilibwinda lilalila, loli umwene aketaga ukukindana na Farao. Ngimba bule linga Farao aaketaga ubumalikisyo bwake? Ngimba bule linga Farao aaketaga ukumilwa kwa kikolo kyake? Mose aaketile ikyo. Bulebule? Na sayansi? Nu lwitiko, Mose aketile ikyene. Kilikyosa iki umwene aabombile kyali kwisila ndwitiko, panongwa yakuti Kyala aafingile kwa Abrahamu, ugwise, ukuti Umwene

isa—Umwene isa kwendelaga ikikolo iki linga fikindilepo ifyinja abamia bana, kangu isakubasosyaga abene panja. Kangu nu lwitiko, Mose alinkwitika ilisya ili Kyala aayobile, nu kumanya mwene, ukuya sya lwitiko, ukuya ndongosi unsaligwa ukubasosya abene panja. Umwene aamenye apa umwene aalipo. Umwene aalyegile ubuyo bwake pa fibwina fya ndipa, ukuya nkanyafula-ndipa, kangu alinkwega ukuheluligwa kwa Kristi ukuya bukabi ubukulumba ukukinda nu kwitugasya pa kikota kya Igupto. Umwene aalyegile. . .Umwene akayobilemo siku, “Une ngukipelela ikisa ikyene.” Umwene alinkwega ubuyo bwabo nu kubuka na bene! Lwimiko ku. . .Umwene alinkwega ubuyo bwabo. Uswe tulinkubuka nabo.

105 Yonongwa unsimbi umpakigwe aayobile:

Une ngwegaga injila na baheluligwe ba Ntwa abanini.  
 Une nandile muno nu Yesu, lino une ngukindilila.  
 Une ndi mu njila yangu ku kisu kya Kenani.  
 (Naloliloli.)

106 Mose. Ikyene kyayobigwe na yumo ukuti Mose kyaali kinunupo, akabalilo kako umwene abagiile ukuya mwanundumyana gwa Farao kangu umwene ali na mulimuli gwa nkisu, umwene kyaali kinunupo ukuya mwanundumyana gwa Abrahamu ukukinda ukuya mwanundumyana gwa Farao. Mwanundumyana gwa Abrahamu, unheluligwe, ukukinda ukuya mwanundumyana gwa Farao, u mwalafyale.

107 Une kinunupo nje mwanundumyana gwa Ntwa Yeso, nu m’bombombombo mwinake Gwake, kangu nukwega ubuyo bwangu nabandu abatagigwe aba nkisu iki, ukukinda ukuya ne Pulezidenti ugwa United States of America unywamu uyu, pamo ukuya ne Elvis Presley, pamo nje Pat Boone, pamo kilikyosa ugwe kulonda ukutendeka ikyene. Une ngwegaga injila yangu.

108 Abakikulu abanini bikufimbilisigwa ukwega injila yabo. Mbuyo bwakuya u—u Mary Pickford, pamo yimo indondwa ya mavidyo ingulumba, undindwana gwa mulimuli, egaga injila yako na banini abaheluligwe ba Ntwa.

109 Une kinunupo nje ndumbilili pa kigemo, ukulumbilila ubukabi ubusitakwagigwa ubwa Kristi, ukukinda ukuya ndondwa ya mavidyo ga Hollywood, pamo umundu unkulumba ukukindabosa pa kisu. Linga une nalyaga ukwiyima, ukusuma, pamo kilikyosa une nafumbilisigwaga ukubomba, une ngwisakwegaga injila yangu na bandu ba Ntwa. Nu lwitiko, une ngubomba ikyo. Une mbegiigwe ulusako. Loli, ni lipyana lya Kyala, une ngaali nguketa nu lwitiko.

Nu lwitiko une mbagile ukuketa ikyene  
 kubutali;  
 Kangi Baba gwitu ikugulila kwisilya kunjila,  
 Ukututendekela uswe ubuyo  
 bwakwitugasyako Kula.

<sup>110</sup> Unyambala unkoma songo alinkuti, ilisiku limo, “Ngimba fiki ugwe gwasanusyaga inyumba yako kukipanga kila? Kiliku iki kikupela ugwe ukupa inyuma ya ma dola amaelifu malongo-mabili-namahano ku kapanga akanini akakulu akaboneke-kanyali kala?”

<sup>111</sup> Une ndinkuti, “Ikyene kikali kipanga iki une nabombile isyene. Ikyene bo bandu aba bali pala.” Une ngaya nafyo nafimo ifyombo fya nkisu. Isumuni yiliyosa iyi une negilemo siku yasanusigwe ku kipanga iki. Fiki? U lwitiko lwangu luli pa Kyala, kangi komma pa findu fya nkisu. Ifyakwikyela fyangu fili mmwanya. Kangi une ngwitika ifyinu fyosa fyofilafila, linga ugwe uli kanunu na Kyala. Isyene syabwanaloli, ukuti umwe muli. Uswe, nu lwitiko, tukwambilila. Uswe, nu lwitiko, tukwitika Kyala.

<sup>112</sup> Mose, umwene aafimbilisigwaga ukutendeka ulusalu. Kangi polelo umwene aafimbilisigwaga ukubomba, bo atendike ulusalu, umwene alinkulwa ulwitiko, polelo, kabuno umwene akaatilaga ubugasi bwa mwalafyale. Lilino, m’bundu, umwene ali nu bwabuke ukutila ubugasi. Umwene ali nu bwabuke ukutila ubugasi bwa mwalafyale, loli umwene akaatilile. Umwene akaabombile ikyene umma, panongwa yakuti umwene aali ni mbombo iyakubomba, kangi umwene ali pa lukindi lwa mbombo. Kangi umwene akaapasyaga’mma iki umwalafyale ayobaga ukufwana ni kyene. Umwene aalyegile injila Yake pope.

<sup>113</sup> Lilino, Farao, ena, akabalilo kako umwene ikuketa atoligwe, umwene aalondaga ukumpa Mose na bana . . . Umwene aatile, “Syosa silikanunu, une ngukubulaga isi une ngubombaga. Umwe mwesa utugalaga itolo nkisu iki kangi mubukege panja nukutwala ifikemo kwa Kyala gwinu.”

<sup>114</sup> Iyo yo njila iyi u mohesi ikubombela. “O, umwe mubagile ukuya banyakyala. Ngimba fiki umwe mutikubuka kula nukwingila ikipanga? Umwe mutikufimbilisigwa ukubomba fyosa ifindu ifi.” Unnyambala ikuyoba ku nkasi gwake . . .

<sup>115</sup> Unkasi ikuyoba, “Ndume gwangu, une mbindwike. Ifyakwipaka mu nyobe kangi umma, pamo ukwipaka mmilomo kangi ni fingi. Ifi kangi umma. Ukusekela panja kangi umma. Ifyafibugutila ifi kangi umma. Une nsokilemo mu kyene! Une ngubikaga akabalilo kangu kukubala Ilisyu, ukupakikisya akaya.”

116 “Lilino, keta, n’ganigwa. Ugwe, ugwe abagiile ukuya nyakyala, fyosa filikanunu. Lilino, keta, ugwe—ugwe gubukile ukukilania *apa*. Ugwe ukyagele ikipanga ikisobi.”

117 Umma, ugwe ukabomba. Ugwe uli nkyabwanaloli. Linga ugwe uli nu ndumbilili, uyu ukulumbilila ikyo kwa ugwe, ugwe kufimbilisigwa ukuya mulamula ni kyene. Londesya kunyuma Ndisimbo nukukyaga ukuti ikyo kyo bwanaloli.

118 “O,” alinkuti, “ubukege ukwisila *apa*. Abene batiku—abene batiku fimbilisigwa ukubomba ifyo ukwisila *apa*. Muketile? Abene batikubomba ifi kuno.” Iyo yo njila... “Buka itolo kubutali fiyo.” Loli umwene atikulonda ugwe ukusooka nkisu. Iyo yo njila iyi u mohesi ikubombela. Umwene atikulonda ugwe usokemo mfindu fya nkisu; twalaga itolo ikisu ni kipanga.

119 Ilisiku limo, ngwisa ngusuluka pa nsebwe, une ndinkwasya irediyo yangu. Kangi yalipo pala i—i inyimbo, polelo ndinkumilisya ukupilikisya, kangi une ndinkupilikisya kifuki inyimbo yosa, bo ngali une nabagile ukumanya ukuti kali iyene yali naloliloli yali nyimbo yasyakyala, pamo mohesi ikugela ukusulusya ifindu fya Kyala pa bupimo bwa nkisu. Ugwe ukabagila ukubomba ikyo! Kyala yaga ni kisa!

120 Une ndikupasya imbaale silinga isi Elvis Presley ikusimba, pa fyosa isumo isyabunyakyala inunu. Umwene akaali ingiligwe nu mohesi. Umwene atumile abana bingi ku gehena, nu kumoga kuko une nkumenye, nkisu kyosa mu lisiku ili. Pat Boone na bosa ba bene, umwene aliingiile ikipanga kya Kristi; kangi Elvis Presley, ugwa baPentekosti; abene bo ba Yudas Iskarioti, mfifwani fya banyambala abo. U mohesi ikugela ukutwala ifindu ifi ifya Kyala, ukuti abene bafifuluganie palikimo ifyene ukusulukila *kuno*. Abandu batikuketaga uko kumwanya ukukinda *iki*. Abene bikuketa pene *apa*, bikuti, “Ena, ifyene fifwene itolo.” Ifyene fikafwana umma. Sooka panja pa kisu.

121 Alinkuti, “Umwe mubagile ukubuka pa masiku manandi itolo. Kangi umwe mubuke, itugala nkisu.” Naloliloli, umwene aamenye abene bikugomokaga. Polelo umwene aasyagenie ikyo kitikubombaga’mma, lelo umwene alinkwinogona ikindukimo ikingi. Umwene alinkuti, “Une ngubabulaga umwe isyakuti mubombe. Umwe mubukege kulikosa umwe mukulonda ukubuuka, loli umwe mubaleke abakasi binu bosa, abaninu bosa, kangi ing’ombe syinu syosa, kunyuma *kuno*. Umwe mufileke ifyene kuno, kangi umwe mubukege panja.” Kabuno, abene baali ni fyombo fyabo kunyuma kula, ifyo fisaga ukuya kinyoywesya kunyuma.

122 Kangi ifyo fyo Mohesi ikuyoba kwa umwe. Pene papo ugwe kufileka fimo mwa findu fya nkisu fikaali pa ugwe, ugwe ukaali kulonda ukukwesa, ugwe kulonda ukunwa, ugwe kulonda ukufwala ukufwana ni kisu, ifyo fyo fyene ifi mohesi ikulonda.

123 Une ngupilika ifindu fingi ifwakufwana nu kugomokelanyuma. Une ndikwitika kulipo ukugomokelakunyuma bo muno abandu bikwinogonela ubwene bulipo. Abene itolo bikufileka ifyombo mu Igupto ukubasongela abene kunyuma, ifyo fyene itolo. Ukugomokelakunyuma kukaya'mma ifi abene bikuyoba ukuya kyo iki. Ugwe ufilekile fingi fiyo nkisu kunyuma kula, fila fyo fikukusonga ugwe.

124 Nkundwe, une ngukubula ugwe, akabalilo kako Israeli itendekeyege, pakati pakilo, abene baalinafyo fyosa ifi bali nafyo nkisu iki, bapangenie kangu bitendekeyege ukubuka.

125 Kyala tutumilaga ulusasanio bo lula. Uswe tukupangaaniaga kilikyosa, nukwitendekeyesa ukubuka. Ukukuta kwa pakilo pakati kukwisa, "Bukaga umwe kukwagana Nagwe." Umwe kinunupo nakyo kilikyosa kipanganisigwe. Ugwe kinunupo ungaya nakyo nakimo, ikisu iki, kikusongelege ugwe kunyuma, ingoye simo ukukukolela ugwe pasi. Pangania fyosa. Tuli tendekesya uswe. Uswe tukubuka.

126 Kangi umwe mumenye fiki? Une ngubabula umwe, abene baali babwanaloli fiyo kwa Kyala, mpaka Farao alinkukina fiyo pakilo pakati, umwene alinkuti, "Soka panja! Soka panja, kangu mubukege. Egaga filifyosa ifi muli nafyo, kangu bukaga!"

127 Une nhobwike fiyo ukuti u mundu abagiile ukuya nubumi kifuki fiyo na Kyala, mpaka u mohesi atikumanya isyakubomba nagwe. Isyo syo bwanaloli. Soka panja! Bukaga! Pilikilaga Kyala!

128 Nu lwitiko, umwene alubwene ulufingo. Unkanya ndipa, pamo akaya nkanya ndipa, umwene aalyegile injila yake na baNtwa abaheluligwe abanandi. Farao alinkuti, "Egaga fyosa ifi umwe muli nafyo kangu sokapo ukufuma apa! Une ngasimanya isyakubomba nanumwe." Umwene aaligwabwanaloli fiyo kwa Kyala, nu lwitiko.

129 Ulwitiko lwisakubomba ifika, linga ugwe kuyaga gwabwanaloli kwa Kyala. Nu lwitiko, uswe tukunketa Umwene.

Akabalilo kitu kamalike; kakindile akabalilo.

130 Loli, nu lwitiko, ulubunju ulu, fyusya amaso ginu mmwanya. Komma ukuketa isyakubasyungutila umwe, ikisu ikya masiku aga, loli keta nukumbona Umwene Uyu aapele ulufingo. Ilibangeli liyobile, "Uswe tutikuketa fyosa mbupelelesye lilino, loli tukumbona Yeso." Ugwe keta ku Mwene, ulubunju ulu, kangu injila syinu sisakusanusigwaga.

131 Papo uswe tukwinama imitu gyitu, nkabalilo itolo, ku lisyu lya lwiiputo. Untwa aliongelelapo ulusayo pa Ndumi iyi.

132 Inogonaga mu ndumbula syinu lilino. Ngimba ugwe gwaketesyaga pa findu fya nkisu? Nu lwitiko, ngimba ugwe kumbona Yeso? Ngimba ugwe kuketa pa bufumuke bwako, ikipanga kyako? Ukuti ubwimike bwako mbandu ni kisu buli

bulebule? Pamo, ngimba mukumbona Yeso Uyu, mbupela kisa, alibiikile Mwene ku kiboko ikililo kya Lwimiko ku Mwanya, Uyu aakubilwe bo mfwilabangi, ungolofu ku basitabugolofu? Ngimba ugwe ukabagila ukufyusya amaso nukuketa u Mpiki gwa Bumi pabutali apo? Polelo, tagaga ikipiki iki ikya sayansi nubumanyi, nukumbombela Umwene.

<sup>133</sup> Ngimba ugwe kulonda ukukumbukiligwa ndwiputo bo ngaali une ukwiputa? Fyusya ikiboko kyako, ku kyakusuma kilikyosa iki ugwe ubagile ukukilonda. Kyala akusaye. Umwene ikuketa ikiboko kyako kyosa.

<sup>134</sup> Linga ugwe uli monangi, fyusa amaso gako nukuketa lilino. Linga ugwe gwali nsitakupasya, linga ugwe ufumile pa kuumana nu tundu utunini, ngimba ko kukindana kuki iki ikylene kikupela? Ugwe kubuka pa kufwa limo mwa masiku aga. Ilisiku liliku? Lumo umwisyugu! Ugwe ukasimanya'mma. Isala yimoyene ukufuma lilino, ugwe lumo kuyaga mu gehena, pamo ugwe kuyaga ku Mwanya. Loli ugwe kufimbilisigwa ukusala lilino. Linga kalipo kalikosa mbumi bwako aka kakaya katalusye, ugwe salaga lilino, nu lwitiko.

<sup>135</sup> Ugwe kuti, “Ena, une linga mbagile ukumpanyanikisya unkasi! Linga une mbagile ukumpanyanikisya unnyambala!” Sikayanimbombo ifi abene babombile, salaga u Bumi. Salaga u Bumi.

<sup>136</sup> Kabuno, Yeso aayobile, “Linga ukufuma mu ndumbula yako ugwe utikuswa umundu aligwesa ubonangi bwabo, yope u Tata Gwakumwanya atisakukuswaga ugwe.” Polelo egaga ikyo kifuki fiyo. Linga kalipo kamo akabibi mu ndumbula yako ukulwana nu mundu yumo, monangi pamo mwikemo, ugwe uli mu soka ya moto gwa gehena.

<sup>137</sup> Lilino fyusya iliso lyako. Ngimba ugwe kuketa fiki, undugu gwako? Pamo, ngimba ugwe kuketa u Mpoki gwako? Ngimba ugwe kuketa fiki ulubunju ulu?

<sup>138</sup> Linga ugwe uli mbine, kangi udokotala gwako ikuti ugwe ukabagila ukuya kanunu, ugwe fyusya iliso lyako, ku kipingika, kuko Umwene aafulele panongwa ya mbibi syitu, ni fulasigwe Syake uswe twagangwike. Komma ukuketa isi u dokotala ikuyoba; umwene ikubomba mu sayansi. Ulwitiko lukubombela nkiyabo kya Mbepo na Kyala. Unko uswe tulinogonaga isya findu ifi lilino akabalilo kako ugwe ufyusisye ikiboko kyako. Kyala agabwene agene.

Unko twipute.

<sup>139</sup> O Gwabwilanabwila Kyala, mbuyemyee ubwa kwiputa lilino, bo i Ndumi yibukile kosa, komma ukusitikisya imbeyu sya Lisyu Lyako, Ntwa, sigwege pa kisu kya mabwe. Komma ukuyitikisya i Ndumi, Ntwa, yigwege pa mitulwatulwa, imifwa, ifi ukupasya kwa bumi ubu (bo yu Loti) gibagiile ukupiita iyene ukugoga, ku bumalikisyo, yiyege yaakutagiigwa. Loli,

O nsayigwa Kyala, yileke iyene yigwe pa mfu unnunu, umoloke, pa ndumbula imbinduke. Kangi ni yangu, yope, Ntwa, ukuti twesa tubagile ukuketela ililangalo lya kuketela kwa Kyala, nukuketa Ikipanga ikikaniigwe ikya Ntwa Yesu, abandu abakaniigwe, injila ingaanigwe, kangi uswe tuli endaga mu njila iyalwimiko iyi.

<sup>140</sup> Bo yu Mose, umwene akaamenye kuko umwene abukaga. Abandu bakaamenye kuko abene babukaga. Abene bakaayimenye injila iyi kubakako. Abene balinkusumuka itolo.

<sup>141</sup> Kangi, O Ntwa Kyala, akabalilo kako akimbo akamogi aka kakwimbigwa, nu lwitiko uswe tukukibona i Kisu kila kubutali. Kiliyaga ikyene itolo lilino, ukuti abanyambala na bakikulu muno batisakwinogona isya isi ikisu kikuyobaga, pamo muno abene bikwendelaga. Balisumukaga abene itolo mu mbepo syabo, nu kubuka.

<sup>142</sup> Mose alinkukongesya Ulumuli, kyangi Ulwene lulinkundongolela umwene ku kisu kya lufingo. Kisita kumanya kuno umwene aabukaga, loli umwene alinkwenda itolo mu Lumuli, ku kisu kila iki kyaali kyelupo ukukinda pa musi.

<sup>143</sup> Tupaga, Ntwa, umwisyugu, ukuti bingi apa bikwendaga mu Lumuli lwa Lisimbo kangi mbwinake bwa Mbepo Mwikemo, kangi ni Kipanga; i Kipanga, Ntala-kupapigwa, abana abapapigwelululu aba bammwambilile Kristi, kangi basondigwe na Mbepo Mwikemo, bikulongoleligwa nu Mbepo. Tuli endaga mbwinake ubu, palikimo, mfindu fya Kyala, ukumbombela Umwene ndosyo, ukupilikila mbufwe, ukusyiligwa, nu kusyuka. Tulimbombelaga Umwene mbulagili Bwake, “Gulilaga umwe mu Yerusalemu mpaka umwe mupegigwe Amaka ukufuma Kumwanya.” Tulimbombelaga Umwene mu kubumbulusya kwa Bunyakyala, ukwiputula ababine. Tulimbombelaga Umwene mu mugonesyo, ukumenyania unkati, ni ndumbula yimoyene, ubwinake ukusyungutula Iliisyu lya Kyala. Tulimbombolega Umwene mu fyosa ifindu fya Bunyakyala, kufika Ikisu kikwisa kukuboneka. Tupaga ikyene, Ntwa. Pilikaga ulwiputo lwitu, bo uswe tukukibika ikyene kyosa kwa Ugwe lilino, mu Ngamu ya Ntwa Yesu.

<sup>144</sup> Lilino ni mitu gyitu gineme, kimyemye, polepole, tuli imbaga itolo akimbo aka. Lilino uko ko kupala. Ubulumbilili bumalike. Nayumo ugwa kusokapo. Yaga itolo kimyemye. Unko tumpale.

<sup>145</sup> Ubulumbilili bo lufundo. Inogona fiyo lilino iki umwe mubombile, iki umwe mwabagiile ukubomba, iki kikupelile ugwe iki ugwe gweywani umwisyugu. Iki kikupela ugwe ulambikigwege, umusyugu, kyo panongwa yakuti ugwe ubombile simo mmayolo. Ngimba kikuyaga fiki kilabo? Pelaga siye kanunu umwisyugu, kangi ugwe kuyaga mwabuke kilabo. Muketile? Ugwe kufimbilisigwa ukubomba ulusalo. Ngimba



kubombaga bulebule ulwene? “Nu lwitiko, une lilino ngulekesya fya filifyosa. Une lilino ngulekesya, kang'i ilisiku limo une ngubuka kwisilya Kula.”

Mbunyafu panandi na panandi,  
Uswe twisakwagana pala pa bumogi- . . .

Mpaalaga itolo Untwa mu ndumbula yako lilino.

Mbunyafu panandi na panandi,  
Uswe twisakwagana ni Kipanga ikiheluligwa.  
(Kikafu ukubuka, loli uswe twisakwagana  
ilisiku limo.)

Kwa Tata unkabi kumwanya,  
Uswe twisakutwala ifiyabo fya lutufyo,  
Kabuno ikyabupi kya lwimiko kya lugano  
Lwake,  
Nu lusayo ulu lwisakukemesyaga agitu. . .

Palikimo na baheluligwe banandi ba Ntwa, nu lwitiko, une ngusala.

Mbunyafu (mbunyafu) panandi . . . (panandi na  
panandi)  
Uswe twisakwaganaga pa kiloboko ikimogi;  
(panandi na panandi)  
Mbunyafu (mbunyafu) panandi na panandi,  
Uswe twisakwaganaga pa kiloboko ikimogi.  
Kilipo Ikisu iki kili. . .

Mpalaga itolo Umwene. Ulo lo lupalo.

. . . lwitiko une mbagile ukuketa,

Nu lwitiko une ngubomba ulusalo lwangu.

Oko, u Tata ikugulila. . .

<sup>146</sup> Une nguketa bosa abaNtwa kwisilya Kula; Nkundwe George, Nkundwe Seward, bosa ababikemo.

. . . uswe ubuyo bwakwikalako Kula. (Ena,  
Ntwa!)  
Bunyafu. . .

<sup>147</sup> Ugwise gwake, Howard, Edward, bosa abinitu abakemisigwe aba baalyegile Injila, kubutasi kula, akabalilo akakinde kala.

Mbunyafu (Ena, Ntwa!) panandi na panandi  
(panandi na panandi),  
Uswe twisakwaganaga pa kiloboko ikimogi.  
Uswe twisakwimba pa lumogi lu. . . (Oko  
Kyala!)  
Ingobeligwa inyimbo sya basayigwa, (Lwimiko  
kwa Kyala!)  
. . . twisakusulumania kang'i'mma,  
Somma ulwikimo lwa lusayo lwa Buyo  
ubwalutusyo bula.

Mbunyafu, bunyafu panandi na . . . (panandi  
na panandi)  
Uswe twisakwaganaga pa lula lumog- . . .



*NU LWITIKO, MOSE KYA58-0720M*

(By Faith, Moses)

Ubulumbilili ubu butwaligwe nu Nkundwe William Marrion Branham, ubu pakwanda bwatwaligwe nki Ngereza pa Ndungu kulubunju, Julayi 20, 1958, ku Branham Tabernacle mu Jeffersonville, Indiana, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)